

編輯

迷
津
寶
筏

乾
部

迷津寶筏

辛巳(1941)年立冬

編輯迷津寶筏乾部(序詩)

玉清文昌帝君 詩

玉闕陳書藻鑑清 清雲捷步入王廷
文章蓋世魁天下 昌運興時博令名
帝澤覃敷加庶類 君恩普被佑羣生
欽承丹詔頒三界 命降傳宣禮肅行

又諭

天威嚴靜肅 敬謹勿驚惶

神人恭跪命 傳達懍堂堂

傳詔

欽奉

玉皇大天尊玄穹高上帝 詔曰。帝處彌羅天上。金闕瑤宮變理陰陽。普被吹噓之化。位育天地。廣施雨露之培。澤及民生恩加庶類。無如綱常不振。道德乖張。逞威肆暴。縱行強弱之殘。鬪智爭能。任意凌夷之酷。災劫相因以示警。兵燹造作以交攻。中外焦然。生靈荼毒。是下民殺業之自招。非帝不矜恤也。咨爾關、呂、張、王、岳、卿。因天則地。覺世牖民。挽既倒之狂瀾。救民生於水火。帝心嘉慰矣。今田中贊天諸子。請造迷津寶筏。查其志誠。准卿奏請。詔勅三界羣真真。應聘効命。著造新書。神人遵依。各盡厥職。書成之後。特加獎賞。爾其欽哉勿忽。稽首謝恩。志心禮謝。

奉旨飛鸞宣化彙造迷津寶筏南天文衡聖帝 關

奉旨飛鸞啟化督造迷津寶筏南宮孚佑帝君 呂

奉旨飛鸞闡化監造迷津寶筏九天司令真君 張

奉旨飛鸞教化編造迷津寶筏先天豁落靈官 王

奉旨飛鸞贊化協造御前元帥精忠武穆王 岳

奉旨專理編造主席南天護世天尊 駱
奉旨統理堂務正主席九天普濟真人 李
奉旨彙造主席南宮顯化真君 趙
奉旨督造主席先天佐道真人 朱
奉旨監理鸞務兼糾察功過南天靈侯太子 關
奉命督訓鸞務兼賞罰功過叅將 安
奉命正馳聘南宮星君 孔
奉命副馳聘九天真相 馬
奉命監理堂務本堂蒞任王天君 鄴
奉命監督鸞務 呂
奉命監理司禮神普興寺觀音 李
奉命司禮神德宮天上聖母 劉
奉命司禮福神 曾
奉命司禮福神 蕭
奉命迎送福神 陳
奉命迎送福神 陳

復聖顏子 詩

潤屋潤身在此心 聖門道義萬民欽
不違三月斯仁至 學顯十知得趣深
允執厥中崇一頁 真傳旁啓守玄箴
簞瓢陋巷居棲隱 克紹未能感嘆吟
儒宗神教序

蓋聞聖人為繼天立極。有參贊化育之功。列紀陳綱。振彝倫之王。化。興仁講義。申道德之淵源。十六字之心傳。作賢作聖。三五爻之錯綜。知顯知微。易曰、黃中通理。正位居體。誠於中形於外。體物而不可遺。位育天地。變理陰陽。司造化之權者。非聖而何耶。吾夫子生居東魯。繼衰周為素王。雖轍環天下而不遇。刪詩定書。繫易執禮。在在作春秋之褒貶。方方持孝義之聖經。道紹聖王。遂為萬世師表。

繼及今也。王綱失墜。倫紀乖張。日尚文明。棄道德而不顧。排除孔孟。鄙仁義之迂談。挺強鬪智。兵燹叢生。莫甚於此時也。因是 關、呂、張、三相。痾瘵在抱。體天行道。救世為衷。闡化飛鸞。開儒宗之神教。引經據典。造勸世之善編。

入迷津者、得之回頭是岸。登寶筏者、渡之出苦是崖。而乾坤永奠。天理流行矣。其間所造之巧妙詩、詞、歌、曲、賦、辨、解、說、論、文。詞賅意切。足以勸勉人之善心。懲創人之逸志。補聖門未申之旨。助王化邳治之隆。此神道設教之婆衷。無微不至。加以和漢兼賅。

新舊同化。頗合時勢之宜。永為傳家之寶珍矣。謹序其畧。以附簡端云爾。歲在己卯(1939)中秋吉旦 復聖顏子序於贊天

護世天尊 駱 評曰

若夫無為而治者。必賴聖道之昌隆。蓋聖人有參贊化育之功。行王道而平天下也。顏聖序中。抱胞與之懷。贊神教利生之功力。裨益於世道人心。豈淺鮮哉。其傳筆之神。行行珠璣矣。

太上道德天尊 詩

馭駕青牛下玉京 關通函谷度羣情
猶龍變化稱賢聖 體道談真說杳冥
一氣分形週六合 諸天統御遍三清
五千道德流今古 教祖推尊利眾生
道紹真傳序

且自洪濛肇判。天地初分。陰陽有序。化育生成。而道之統天。萬物之統御。變化存神。出沒不測。人欲淨盡。天理流行。此道之運用無窮也。聖人法天象地。必修道德之精華。存乎心而發散於外。養其氣而合其真。無為而無不為。空空而無所空。所謂浩然正氣。塞乎天地之間。道為萬靈之主宰。德為一身之立基。成仙作佛由此出。超凡入聖亦由他。是道德不可須臾離也明矣。嗚呼、世衰道變。今古異時。爭文明。棄根本而不顧。偏趨巧智。斥儒道為迂拘。異端邪說。曲學爭鳴。強弱互傾。賢愚爭競。而刼禍頻仍。戰端日甚。生靈塗炭。民物傷殘。莫茲為甚。道之危微。於此已極矣。尚幸 關、呂、張、王、岳、諸真。代天體道。佈教綏猷。飛鸞救刼。覺世牖民。開神教之法門。宣妙道之要旨。方方顯化。處處開堂。代表三教之本衷。救度眾生之惻愍。其所造之新編。謂渡迷津之寶筏與乾坤合其德。與日月同其明。詩歌雅咏。詞曲韻調。盡諸真論賦之雄豪。得列聖序文之傑作。行行鍼砭。句句良箴。洵可繼前賢之木鐸。為後生之準繩。和漢兼賅。文意條達。俾悅目爽心。領畧神道之真傳。奉行於勿失也。特序其妙。以贊化育之功於萬一耳。是歲己卯(1939)桂月(8)月中浣太上道祖序於普興贊天

護世天尊 駱 評曰

道本無言。因言而道顯。造化之妙因。運用於無窮。成仙作佛。超凡入聖。莫不藉道德而修證也。然人能弘道。非道引人。末世澆漓。捨道德而尚文明。生存爭競。物類塗炭。使道祖序中之感慨。文法之起成。一片慈衷。贊嘆盡其妙矣。

人天教主釋迦牟尼佛 詩

人在惟我道是尊 普示慈悲駕慶雲
五眼六通明夙慧 有漏漏因法相根
不染性中常自在 靈靈覺覺照時存
反妄歸真序

嗟夫眾生為人我邪見。迷墮如來真性。貪着利慾。牽掛痴緣。流浪生死。輪迴無停。我本慈悲。深憐世苦。開教東林。普利生之法旨。給孤獨園、說般若之妙音。無苦集滅道。以無智得。故依般若婆羅蜜多。故得阿耨多羅三藐三菩提。示人無執着修行。乃得登彼岸。而成正等正覺也。然必受三皈五戒。以放生戒殺為先。戒殺即消劫運。放生即生慈悲。慈悲而生智慧。慧、即佛也。欲修佛道。有何難哉。無如衆生不悟未能反妄歸真。至此萬派支流。宗教混雜。異端四起。正法晦冥。莫可言喻矣。幸關、呂、張、王、岳、諸真。体聖人以神道設教而度人。飛鸞濟世以回春。請旨造書而勸善。耳提面命。受化覺悟良多。諭訓筆申。修省回頭不少。其中之著作詩、詞、曲、賦、論、文。字字金鍼。行行珠語。足見仙神傳真之工。聖佛玄妙之雅。得是書者。則迷津可渡。寶筏可登。旋轉乾坤。挽回造化。俾衆生得入光明之路。而臻般若之鄉。佐三教並行之引領。盡諸真廣濟之婆衷。輔國佑民。尊皇重道。皆於此書得之矣。畧序數言以贊云。

護世天尊 駱 評曰

夫劫運逞生。眚災疊現者。皆由衆生貪殘殺業所由來。佛本慈悲。願人衆善奉行。同修如來智慧。共登般若之鄉。佛法平等。願與羣生成正覺也。釋尊序中之妙。筆現具葉之文。為蒼生之惓惓。和儒道以利生。極贊神道設教之要領。裨家國而益民生。而芸生可不知三教覺世之恩。深且厚哉。

幽冥教主地藏王菩薩 詩

幽冥苦報眾生愆 教主施恩廣妙緣
地道承尊安庶類 藏經啓秘化諸天
王侯敬仰宗風振 菩薩慈悲甘露綿
降駕度人修性理 序文道意贊新編
神教利生序

夫神教者、所以教化人而歸善路也。人無信仰之心。則天地鬼神無所忌憚。放僻邪侈。無不為己。故三教聖人。先得我心之所同然。乃分儒、道、釋、之教門。因時制宜而應世焉。名異而道同。何曾有差別哉。往古來今。教道之興衰不一。人心之變幻日漓。科學文明。道德零退。莫甚於斯時也。惡生好殺。釀成劫運之殃。背逆挺強。招惹誅夷之禍。生靈塗炭。人物毀傷。深可悲憫矣。於是 三相代天宣化。以神道而設飛鸞。醒民心於覺路。度黎庶出迷津。藉寶筏之慈航。體乾坤之化育。而所造之新編。其中詩、詞、歌、曲、賦、辨、解、說、論、文。詞理兼賅。發揮聖道。巧妙文。華。豁人心目。和漢融通。啓新學之法則。中外普遍。托神化之心傳。藉以匡救善導。俾後生之德性於勿失。此神教利生之主旨。深且切矣。得是書者。當拳拳服膺而弗失之。是為序。 時維己卯(1939)中秋後越五日幽冥教主序于贊天靜室。

護世天尊 駱 評曰

夫教主之救世情愍。利生度死。司地府之威權。痛感衆生造業。苦報循環。何時出苦哉。幸神道設教之便。藉筆傳真。盡聖佛功化之極。利濟無窮。序文之工。贊盡其奧。足感婆衷矣。

武當山玄天上帝 詩

武緯文經治世平 當修正道豁魔精
山魍魎皈要道 上真整肅放光明
帝心簡在施恩厚 萬類均霑教化行
迷津寶筏 讚

臺處東瀛 灣曲魚形 島臨海上 臺景堪稱
中高山岳 州治和平 員潭日月 林茂景清
郡民樂業 田沃豐登 中通南北 庄社安寧
普受王化 興旺門庭 贊爾士庶 天福是迎
宮臨聖駕 迷惑光明 津津有味 寶重欽承
筏向人渡 乾健道行 坤維得位 二象合成
卷中誅語 新化堪評 書成指日 讚仰神靈
無為而治 量才權衡 功垂萬古 德蔭蘭馨

又詩

神教無形治 法門體聖開 仙真襄化育 聖教發慈懷
詩詞歌巧妙 論說賦奇才 時勢為龜鑑 和文特別裁

護世天尊 駱 評曰

藏頭作讚。敘事韻諧。筆花生彩。篇內增輝矣。而上帝之體天行道。足感保民護赤之惻憫耳。

南天文衡聖帝 關 詩 太子代傳

馳驅赤兔下南天 浩氣凌雲效聖賢
刀偃青龍神鬼伏 功高帝胄王侯肩
五關斬將明忠義 赴會單騎膽壯前
熟讀春秋知大節 桃園美譽古今傳
跋

慨乎世道之衰也久矣。王綱失墜。道德衰頹。歐風東漸。日尚文明。只徒智慮以交攻。每事爭強而角勝鄙仁義為迂談。闢孔道為邪說。於是兵戈四起。賊子橫行。頓忘君親之重。弑逆不道叢生。奚顧彝倫之化。乖違相杵是習。縱鄭衛之淫風。肆歌舞之亂樂。甚至君不君。臣不臣。父不父。子不子。上下凌夷。尊卑顛倒。殺業多端。累成災劫。至此為甚矣。因是目擊時艱。不忍不教而誅。與呂、張、王、岳諸真。代天宣化。到處開堂。藉飛鸞而傳神教。憑木筆以造善文。開方便之法門。醒人心之覺路。歷代以來。顯應事跡。傳經演懺。著作金篇。不啻數千餘種。無非代三教講道德、說仁義、為要諦。体上天昭善惡、明報應、之威權。上輔政治於家國。下佑感化於民生。與其治有形之律法。何如治無形之精神。此神教化之苦衷。備矣盡矣。今書既成。蒙三教慈尊而降序。叨列聖惻隱以垂箴。依時勢之潮流。應人心所趨向。專以詩、詞、歌、曲、賦、辨、解、頌、論、文。費仙真之珠玉。極巧妙之才華。得藉贊修楊子明機以傳神。賴贊天陳、蕭、曾子等之倡首。以成不朽之功也。其中詞意兼賅。漢和備用。使新舊之學。可受同化。而迷者知津。載寶者得筏。贊乾坤陶鑄之恩。感神人用命之切。謹將要畧而跋云。

護世天尊 駱 評曰

聖帝之大義參天。慨夫亂臣賊子乖倫背義之徒。職掌鈞衡。日理萬機。猶抱代天宣化之權。體三教之慈衷。藉神道而設教。著經造書。歷顯神威之化。輔王道郅治之隆。其功可謂偉矣。此跋之感慨。抱無涯之慈憫。現身說法。詞氣宛如平生。真堪為蒼生感頌耳。

南宮孚佑帝君 呂 詩

神化無方啓妙音 度施慈濟拔淪沉
指南寶鑑薪傳現 反妄規箴覺悟深

木筆提撕扶劫運 金篇說法度儒林
有緣契合天堂路 茫海知歸樂性心
引

若夫修因種果。志道造功。無緣不能湊合。薄德難種菩提。夫子之墻數仞。不得其門而入。聖域賢關。無緣入不得也。蓋道不遠人。人之為道而遠人。何以為道哉。故聖人知人心惟危。道心惟微。不得已以神道設教。而天下服矣。自漢季文昌帝君。飛鸞闡教。傳至於今。宣揚三教之真傳。演說經懺之妙典。輔翼孔道。普利羣生。可謂盛矣。奈何道化興衰。天運有在。至此邪正紛淆。奸雄並起。機械變詐。道德淪亡。生存競爭。人物遭劫。聖佛仙真。深憐世苦。應聘而造善編。開迷津之覺路。駕寶筏以渡人。俾乾剛坤柔而得位。過規善勉以修身。書中詩、詞、歌、曲、賦。可依樂府之音。讚、頌、序、論、文。堪賞文人之咏。得仙真之傑作。藉明機以傳神。此神教勸世之慈衷。無微不至矣。今書成指日。聊將所自。引而申之。以贊聖神功化於萬一爾。

護世天尊 駱 評曰

夫聖人繼天立極。為道統之丕基。而神教代天宣化。開濟人之方便。自古及今。受度不少。宜乎萬民尊重矣。此篇所引。盡神傳之妙。俾衆生知開教之所自。可到呂祖之慈惻矣。

九天司命真君 張 降

九重傳奏佑羣生 天賜恩膏澤世情
司察災祥權造化 命施禍福掌銓衡
真修道義身心樂 君宰治安家國平
降鑒飛鸞為木鐸 記功賞善受光榮
道源記

夫所謂神教者。上利家國。下澤民生。體上天好生之德。啓下愚聾瞶之蒙。善賞惡懲。顯神威之教化。耳提面命。藉木筆以傳宣。千禱百祈。秉至誠而昭格。旁敷佑啓。開格外以垂恩。談道德而化奸頑。闡因果而明報應。陰陽禍福之機。功業循環之理。演經著懺。行道造功。莫不賴聖神傳真啓教之大法門也。故易曰、聖人以神道設教、而天下服矣。自文昌帝君、代天宣化。闡教飛鸞。唐宋為盛。繼今二千有餘秋。歷代之宣猷不息。多方之顯化無窮。助國家郅治之隆。感善信去邪之路。此神教利生之惠大矣哉。然神教之傳。自蘭陽新民堂、繼及碧霞宮。次頭圍、喚醒、普及淡水行忠。繼傳三芝智成堂、為道化中興之始。於甲寅(1914)建堂造書、化及省躬。戊辰(1928)開贊修於臺北。利南北交通之便。後於石龜溪感化堂而造新書。然欲立一定之法門。乃於丙子(1936)著儒門科範於贊修。以智成為根據。勅賜

儒宗神教、道統克紹真傳法門之稱號。以利慶、祝、酬、祈、超、薦、凶吉事之法節也。凡為門下。各依矜式而善用。有心道化者。尚有真傳。當向贊修楊正理。及智成直接而授受。庶不負一貫真傳也。今贊天宮陳、蕭、曾、諸子。首倡興堂。請造迷津寶筏。乾坤二卷。書成、其中之詩、詞、歌、曲、賦、解、說、論、文。勞三界聖佛仙神之佳作。得贊修正理楊子之傳神。化行南北。張、林、輔之。為諸真之知音。盡至誠而立奇功也。幸竣美學。畧將道化之源。舉其畧而記云。

護世天尊 駱 評曰

夫子之道。紹百王為萬世之師表。與三教而並立。而神教以木筆傳神。代天宣化。代三教以度人也。如得正緣之繼續。雖經數千年。亦不失其緒。一堂成敗。正理之係匪輕。得贊修楊子之傳真。由北而南。道化其可頌矣。立儒宗神教之法門。補宣聖未申之旨。為儒門及鸞下一一定之大用也。九天輔相此記。包括道統之源流。可為後學之知津矣。其中所著。盡可奉為矩範耳。

先天豁落靈官 王 詩

火輪高駕出先天 斬斷魔氛解倒懸
電閃金睛驅疫癘 風鳴鐵鎧伏邪緣
鋤奸除惡難輕恕 賞善嘉忠好勉旃
到處飛鸞行救世 宣揚教化造新編

讚離騷體

贊天化育兮 功等地天 天心好德兮 佑啓無邊
宮中傳命兮 廣度良緣 著明禍福兮 勉人心田
造方便路兮 就正莫偏 迷而知覺兮 共曉善遷
津梁藥石兮 利濟安然 寶惟為善兮 祖德綿綿
筏作舟子兮 受渡不顛 乾男剛正兮 忠孝心堅
坤女柔順兮 節義為先 二儀妙理兮 蘊奧真詮
卷中克備兮 詞賦相聯 全通和漢兮 新舊叅焉
部諧洋式兮 敬重詳研 功垂萬古兮 普化大千
成就美學兮 世世相傳

護世天尊 駱 評曰

王天君之敦篤教化。藏頭作讚。體倣離騷。盡惻隱覺世之衷。極讚此書之妙。可為當世之尊重也。

精忠武穆王 岳 降 詩

文韜武略冠群英 立品清高膽氣平
敵愾勤王興宋王 披肝救駕敗金兵
金山贈偈風波禍 揚水遺鎗變幻驚
忠孝雙全和節義 靈歸天府史留名
讚神教頌

神心救世。欽命玉京。體天心之愛赤。施惠澤於東瀛。木筆提撕。醒人同登覺路。砂盤示跡。勸世咸出迷坑。方便路。智慧城。諄諄伸訓誨。切切細叮嚀。願人受化育。指引發虔誠。勉善開賢修品詣。褒忠勸孝秉真誠。神威力。莫可稱。降祥降禍。現跡現形。保持家國。護佑民生。冥中佐吏治。實際衛安寧。救劫匡君興社稷。綏猷錫福化昇平。神教仰。精神興。惡緣盡絕跡。善路勉力行。遵聖道。學盤銘。男女修規訓。家門慶顯榮。贊天開盛會。宮內降仙靈。著造勞神駕。迷津渡可登。寶筏慈帆藉。乾坤造化。成。卷卷珠璣語。頌功萬載名。

護世天尊 駱 評曰

夫三教聖人。傳經典於萬世。後學乃得所師。而神教著造善編。人信如在其上。得沐神庥以昭格也。聞善知趨。見惡知改。是善書之化人為得力。御前元帥岳此讚。可謂盡其感慨而稱頌也。

南天護世天尊 駱 降

護佑羣生惠澤長 世緣廣結善緣彰
天心愛德惟寬恕 尊我懷仁獲吉祥
編造卓牢馨翰苑 輯函啓秘繼書香
迷津指引康莊道 寶筏渡人出苦鄉
神教法規十二則

- 1、三綱五常、以重聖門。
- 2、克敦孝悌、以肅人倫。
- 3、謹守國法、以戒爭訟。
- 4、篤愛宗族、以昭雍睦。
- 5、崇重法門、以堅信賴。
- 6、黜革異端、以崇正道。
- 7、明修禮讓、以厚風俗。
- 8、尚持節儉、以惜財用。
- 9、解釋讐忿、以重生命。

- 10、內外兼修、齋戒慎懍。
- 11、體天行化、克己度眾。
- 12、勤求精進、日就成功。

內閣中書 徐 詩

文明日進道心微。造業多端肇禍機。
宄訐交攻相鬪智。奸雄荼毒互爭持。
技能百出誇榮顯。巧計千般逞惡為。
黎庶貽殃殊可忍。紛淆是世可傷悲。

代天巡狩欽差大臣 韓 詩

代天宣化體羣生 巡狩安邦簡閱明
欽命有加崇正義 差非未許順私情
大敦雅教推恩厚 臣宰洪慈治世平
韓氏文風興帝室 降衷宥啓鑒虔誠

又詩

三相呈疏奏 生們造善編 欽差臨檢點 奉旨降羅天
各盡勤勞效 確遵禮拜虔 迷津堪指引 寶筏度良緣

玉清文昌帝君 詩

欽奉丹書降帝階 諸天佛聖下瑤臺
洪恩優渥生民裕 寶筏度迷救劫災

又

神人同命效新編 聖佛仙真降駕聯
無怠厥躬須謹慎 功圓姓氏榜頭懸

南宮孚佑帝君 呂 詩

關心世道造慈舟 救苦度迷出劫頭
降駕不辭跋涉苦 神人効命下瀛洲

又

一封表奏九重天 請命開期聖駕聯
圓滿新書垂宇內 神人欣慰慶無邊

九天司命真君 張 詩

為造慈航度衆生 救人水火出迷坑
仙真大費婆心血 降述詩文化世情

先天豁落靈官 王 詩

火輪特駕降瀛東 救劫消災化八風
贊助新書垂萬古 天人合一體大同

復聖顏子 詩

聖道興衰復興 興期不遠尚文明
文明景象新家國 國治尊皇天下平
又詩示贊天宮地缺處
贊天化育好風光 勝地鍾靈重素王
吞吐未分低失序 仰高排闥自堂皇

太上道德天尊 詩

人靈萬物道惟微 微顯興衰造化機
機變多端歸正統 統天臨下佈恩威

人天教主釋迦牟尼佛 詩

佛法無邊願不窮 存神運化正斯中
從容中道聖人也 取捨勿忘蘊厥躬
又詩
無情無道道因情 情性相凝念佛生
頓悟本來何去住 明機妙理悟修平

幽冥教主地藏王菩薩 詩

塵世紛紛尚鬪爭 爭強挺智挺才能
才能施盡終須了 了却冤愆受刳刑

南宮孚佑帝君 呂 詩

聖神功化補天工 普利民生化大同
贊善開賢行大道 此心安樂在其中

南天文衡聖帝 關 詩

從來大義可參天 天鑿無私佑善賢
賢聖不磨為法則 則天則地化無邊

又詩

敦修仁孝懍芳規 彪炳思元道勿違
茫海指歸同贊仰 贊平天爵好緣推
諭

吾司鈞衡重任。萬國咸歸。刻不容間。每抱代天宣化之權。今爾贊天曾、蕭、陳、張、林、諸子首倡贊天。始終如一。乃得此日圓功。勞主席編集之苦衷。得子等効勞之勉力。永垂不朽之名。吾亦欣然降駕。以贊書成。願爾等以後。當加善勉。勿怠初衷可。然吾素抱忠義之衷。最惡不仁義。乖倫背德。濫矢風流之徒。犯者急修省。未犯者必縮足戒心。庶免自貽伊戚也。當依主席之訓焉可。

南天駕前將軍 廖 詩

作罷詩歌勸世人 人能樂道可安身
身家無累膺多福 福祿盈門耀祖親

隨駕童子 林 詩

童兒隨師駕 遊玩出蓬萊
凡境奢華地 賞心樂素懷

又詩六字体

今宵隨駕臨堂 領畧下界風光
生們殷勤獻禮 童子感領不忘

鐵拐仙翁 李 詩

好結塵緣與道緣 飛鸞著作我為先
今天邂逅贊天會 領畧香醪醉欲顛

又詩

鐵拐隨身邊 芒鞋踏大千
蹁躚遊世界 醉臥不知年

精忠武穆王 岳 詩

霞宮開教道惟微 繼續真傳造化機
南地發祥同贊仰 修成天爵指人歸
又贈諸子
妙明機理輔張林 雲化修程平氣深
茫海無方期可指 歸中曾寄好蕭森

岳太子 詩

迷途知返好修程 津水長流妙化成
寶物歸空携不得 筏堪渡海岸先登

岳元帥駕前將軍 牛 詩 步前韻

迷悟無妨好去程 津津有味早修成
寶山過盡空歸手 筏作舟航彼岸登

岳元帥駕前參將 安 詩

迷離不悟弗知程 津竭神傷活不成
寶玉空觀誰是福 筏如失棹岸難登

太白仙翁 李 詩

嫦娥無意理妝臺 寶鏡埋雲掃不開
直待東風消息到 廣寒微啓賞心懷
廣寒微啓賞心懷 懷念蒼生受劫災
災劫頻仍傷水火 火中埋沒喪英才
火中埋沒喪英才 才藝兼優鬪智來
來往爭強憐世苦 苦情難免受沉埋
苦情難免受沉埋 埋盡天良實可哀
哀痛生存遭劫運 運籌決策不須猜
運籌決策不須猜 猜度天機造化裁
裁判盈虛從大數 數移運轉巧輪迴

數移運轉巧輪迴 回轉天心至德培
培養良能修要道 道根鞏固理兼賅
道根鞏固理兼賅 賅備天真德性開
開悟不難圓道果 果從培植進瑤台
果從培植進瑤台 台閣莊嚴不染灰
不染灰塵真勝景 誰知勝景即蓬萊
誰知勝景即蓬萊 萊蕪多生作小齋
齋戒祀天誠可格 格神品德要無乖
格神品德要無乖 乖戾空勞事不諧
諧順和衷安素志 志強平步上天階

護世天尊 駱 評曰

詩如流水 詞氣如風

直露太白之胸畧矣

又詩

久傳太白好詩名 名久善詩樂性情
斗酒百篇唐史在 唾風珠玉吐而成

詠五福 見書經

一曰 壽 十六字小詩令

年。享期頤三萬六千。真鑿鑿。修福慶無邊。

二曰 富

錢。倉廩盈盈富滿天。天福享。夙種好心田。

三曰 康寧

堅。堅如松柏享康年 病魔了。清正結良緣。

四曰 攸好德

賢。賢人是富德為先。傳家寶。裕後與光前。

五曰 考終命

仙。無病善終笑九泉。心德好。允證樂西乾。

又詩

詩詞作罷興方濃 重把金杯進一缸

時刻無多難再詠 廣寒宮閉鎖眉龐

又詩

滿席佳珍壽誕開 良辰美景降臨來

仙人大會非容易 盡興而歸謝一回

又詩

鐵拐仙朋聯袂臨 觥籌交錯表芳心
吟詩飲酒吾尊擅 停筆讓君把酌斟

鐵拐仙翁 李 詩

翩翩醉醉醉翩翩 量過三分又再聯
太白揮毫吾把盞 玉山頽下好歸眠
詠中秋雲月
人間天上樂芳辰 月掩雲中厭世親
透出廣寒清暑氣 賞心敗興淡而真

護世天尊 駱 評曰

五福之咏。筆下如龍。詞簡意賅。瀟灑出塵之概。
不膠俗韻。足以悅目賞心。二李聯吟得趣。醉中仙耳。

台北指南宮孚佑帝君 俞 詩

幸逢勝會造新編 贊化生們結善緣
天道好還修正理 宮通南北互相聯

一殿秦廣王 詩

數回造冊會楊林 贊道代天體聖心
嘉爾曾蕭陳美舉 他年優遇德宜深

十殿轉輪王 詩

茲逢勝會造新編 寶筏渡人結妙緣
三界開通同會合 生們幸遇善宜堅

贊天宮主席 李 詩

此部新編異眾同 別開風化雅而方
文賅意義無多輯 吟咏自如豁世衷

新竹市城隍 石 詩

協力新書到贊天 救民水火度良緣

生們竭力修功果 脫劫消災福祿綿

南宮星君 孔 詩

南北奔馳日夜忙 宮中下降振民風
星光燦爛中天主 君國英豪壯聖皇

九天真相 馬 詩

九氣清風兩袖輕 天君有命降東瀛
真心欲造迷津筏 相爾君方化劫平

佐道真人 朱 詩

佐國衛朝護萬民 道心耿耿德為親
真心效力毋容倦 人與神同勉厥身

霞宮參將 安 詩

參究真機化大千 將軍護國救危顛
安居樂業生民本 降示詩文體聖賢

顯化真君 趙 詩

顯顯威儀壯帝朝 化民善路德高超
真常不紊根基固 君主臨民樂帝堯

護世天尊 駱 詩

護佑生民德澤施 世風丕變賴維持
天心愛戴無私淑 尊道而行化四夷

普濟真人 李 詩

普度東林苦海沉 濟施愛眾挽人心
真真是道毋思懈 人我相扶守戒箴

南天錦衣使者 楊 詩

錦繡文章世所誇 衣袍不縑不為華
使行下土扶君主 者輩和衷志可嘉

九天護衛使者 張 詩

伴駕真君下界行 神人同命度羣生
各宜耐力殷勤勉 他日書成萬載名

又詩

奉命巡行救劫災 衆生遭劫可憂懷
勤行功果邀天眷 趨避知方仗聖裁

又詩

恩君職務日忙忙 四大部洲掌握中
降罰褒封憑善行 不徇私淑佑賢良

又詩

聖賢憂道不憂貧 克己造功種妙因
禍福無門休自負 老天愛顧德為鄰

先天使者 林 詩

効力無疲數月間 榮名耀祖不為難
高真連袂為生計 體聖慈衷用意關

又詩

人事紛紛天界同 衆生造劫惱穹蒼
釀成劫運傷兵燹 神聖悲衷拯救荒

又詩

開堂救劫挽民生 著造新書減苦刑
有志體天興教化 勝君富貴博虛名

監督鸞務 呂 詩

故友親朋會一堂 新恩舊義不忘衷
監鸞用命時相就 難遇良機要始終

又詩

諸真下降日奔馳 欲挽頽風惠澤施
各要至誠勤効力 立功造果趁明時

司禮福神 蕭 詩

靜肅禮儀真 威嚴對聖神
輪流詳煉習 互相勉同寅

又詩

克己行慈善 身家獲吉祥
此心無退志 自可格蒼穹

司禮福神 陳 詩

司理威儀柄 禮容要察真
福源從篤厚 神化德為鄰

司禮福神 曾 詩

判別災祥佑善良 成人美學德流芳
斷然不昧因和果 曾種藍田玉一穰

又詩

司察昭昭過與功 禮門義路廣包容
福緣善積家聲振 神道公平不貳衷

修信堂司禮福神 陳 詩

司候諸真降駕臨 禮儀確守跪而興
福從心造當加勉 神鑒無私不順情

司禮福神 陳 詩

夜氣清涼味 神人効力勤
淡中生雅趣 學禮學斯文

護世天尊 駱 詩

代天宣化挽民生 一點慈悲救劫沉
不避塵情五濁世 只期黎庶早回心

南宮星君 柳 詩

諸真救世費婆衷 不憚辛勤下九重
保赤護民消劫運 慈航普濟挽頹風

南天駕前將軍 廖 詩

蒼生造惡劫橫生 八難三災氣不平
掃蕩妖氣清國土 好心修德免憂驚

霞宮參將 安 詩

蹉跎歲月疾如梭 人事無常變幻何
克己行功修善果 邀天眷顧化災魔
又詩

劫運當頭急向修 諸真忙碌解災尤
開堂住蹕行方便 怎奈蒼黎不解愁

松柏坑玄天上帝 高 詩

護國佑民化劫災 驅邪逐疫是吾懷
萬家香火咸欽敬 濟物利生澤靡涯
又詩

着意修身好造功 千秋勝會總難逢
諸真救世婆心切 善道匡扶化劫殃

普興寺觀音菩薩 李 詩

末世能修德立深 消災散禍化殃沉
神仙救世開方便 濟溺扶傾費苦心
又詩

恩君道化體天開 護國安邦化育裁
著造新編留世勸 千秋木鐸德無涯

乾德宮天上聖母 劉 詩

一方鎮豁佑民生 吾本慈悲德澤行
上仰天恩施愛戴 保民護國體羣情

受天宮玄天上帝 詩

自從感化結良緣 再到効勞降贊天
勝會相因吾喜慰 驅魔逐穢免憂煎
又詩

陰陽律法烈如爐 賞罰褒懲德不孤
謹慎持躬無罪惹 安閑快樂契於吾

南宮孚佑帝君 呂 詩

南北東西共一家 宮中重務事如麻
孚施雅道維風化 佑啓良箴醒俗差
帝德無窮宣惠澤 君恩有造破迷邪
降臨體聖扶王道 前示芸生種德嘉

台北霞海城隍 湯 詩

道化重開契贊天 羣真降駕度良緣
保民護國新風化 賞善褒忠著簡篇
宥啓無為恩有送 醒迷聯絡德無邊
普行公益存方便 社會推尊感戴焉

九天醒世真人 吳 詩

蘭陽道化己南行 神教飛鸞度眾生
贊助天心修善路 智謀人力信根成
明機體聖傳真法 覺路輸誠悟性靈
寶筏迷津由指引 皇民時勢可中興

先天豁落靈官 王 詩

先庚後甲序攸分 天津森嚴世共聞
豁達襟期舒勝概 落霞耀彩慶風雲
靈山毓秀居棲隱 官宦勤王朝拱尊
降鑒飛鸞臨下土 褒功賞善表彰勤

佐道真人 朱 詩

輔世牖民德立基 尊皇重道勵堅持
宗風丕振維神教 雅度宣揚重聖祇
祭祀真誠如在上 奉公克己懍威儀
務民義務須當盡 本固邦寧任所宜

南宮顯化真君 趙 詩

南北東西合大同 宮中降駕振民風
顯明道德開方便 化示珠璣啓訓蒙
真性靈明元不昧 君恩優渥永融通
趙家完璧無雙寶 降著恩威述聖功

臺南城隍 倪 詩 連環步韻律詩

味然靈爽判真真 真假終歸善惡因
因果分明勤積德 德功懋勉好存仁
仁慈顛沛相扶愛 愛惡貪癡不是人
人我無分須大化 化行中外道維新

新竹城隍 石 詩

神聖紛紛救劫危 匡扶六合度民皈
三災八難蒼黎造 五逆十纏赤子為
兵燹瘟癘難幸免 瘡痍滯旱莫言虧
急施方便逢人度 共濟慈帆出苦圍

編輯迷津寶筏乾部(詞)

九天醒世真人 吳 詩

九轉功夫悟道深 天人合一夙緣臨
醒心常覺真修路 世味無關了脫吟
真假互參歸一致 人仙並立化三心
吳家幸遇恩君度 正理任鸞守聖箴
贊神教利生詞

人身實難得。難得遇正緣。正緣幸遇契神仙。神仙何所見。神教結深緣。寫鸞箋。珠璣字字傳心法。心法傳真著簡篇。耳提猶面命。益世箴規化大千。化大千。向善堅。善堅無惡念。惡念化為煙。去邪歸正道。守分安常樂自然。立身知孝義。出仕效忠賢。賢賢賢。忠賢千古仰。千古仰無邊。神道教。治心田。匡扶邦國育英賢。著經造善冊。無形贊化焉。神人同輔國。功德頌無邊。頌無邊。精神奮發益勉旃。皇民開覺路。効力益當前。

又詩

神教無形助 治心不失規 師賢行正路 尚義絕間非共效皇民化 勿偏軌道圍 時時存省察 自可得安危竊謂臺島神道之教。自我蘭陽始。余本頭圍散人。五術謀生。幸逢喚醒興堂。余歸門下。錄為正理。數部書成。守道遵規。真傳不失。方圖報効聖恩。何期不惑餘年。早辭塵世。蒙恩特拔是職。感荷無似。故願各堂。以助勸世。今逢贊天首事等。真心道化。不避非常。得贊修正理楊生。繼道統之真傳。普及南部之鸞風。傳正緣之心法。明機之功。可謂厚矣。余不揣固陋。特草俚詞。以贊神教於萬一。而勉生等知所尊重耳。

護世天尊 駱 評曰

神心救世。藉木筆以飛鸞。賞善褒功。使人共知警惕。使人共知警惕。乃有邪正紛淆。致乖善道。智者於此可善悟焉。

霞宮參將 安 詩

世道紛紛似奕棋 生存爭競總堪悲
好修道德為根本 力把陰功作立基
啓發後人崇篤厚 開明先聖豁愚痴
時懷惻隱行方便 善必榮昌信可期
為善必昌詞

塵世事。慮縈縈。慮縈世事日無停。爭榮顯。奪利名。利名榮顯互交爭。交爭忘道義。兔窟巧三營。見利忘義實堪驚。作孽殃孫子。招愆累後生。何如為善最樂。何如積德芳名。耐苦志。名利輕。輕財重義冠羣英。陰隲眉間現。祥雲頂上升。吉神護。正神迎。貧人不貧道。福曜日日生。食不過藜藿。衣不過葛藤。懸鶉何足恥。道德益關情。關情無厭恨。氣和與心平。心平浩氣通天地。為善必昌貴顯榮。古來信不誣。惟患不能行。行乎、行乎。昭報分明。

護世天尊 駱 評曰

世人只知積財為子孫福。不能積德為子孫享。作業招愆。貽累宗祖。其愚何甚也。此詞之敦切規勉。可為龜鑑焉。

九天真相 馬 詩

捨生取義德為基 福蔭身家善力持
克己造功邀美報 利人方便發慈悲
恒存暗室無他昧 刻懍冥中有聖窺
省察無慚神可表 自然天地不相虧
作孽貽殃詞

人性之初本善。習性相遠而遷。不申教義竟忙然。良能昧却行偏。德背乖違沾染。作奸背法招愆。羞辱祖宗惹罪纏。徒負人生可憐。

又詞

禍福無門自召。欺心背法狂狷。三途苦趣受熬煎。暴棄埋沒英賢。只為貪嗔癡誤。罔知錯覺而然。六道輪迴受業纏。猛省快樂神仙。右調西江月二則

又詩

一念能存正 萬緣不染人 良朋堪結契 損友莫相親
芳躅時追步 閒邪刻遠頻 災非難近我 快樂似仙神

護世天尊 駱 評曰

人性之初無不善。蓋性相近而習相遠。道德之教育。不可不重矣。詞中之條達規戒。詞理兼賅。可奏西江月一揆之妙音也。

松柏坑玄天上帝 高 詩

神道慈悲本好生 保民護國顯威靈
家家仰戴垂加佑 處處尊崇感化行
藥石津梁堪救世 恩膏惠澤及羣情
飛鸞濟度相敦勉 以德為基博美名
神為護國詞

神處極樂界。降為護國靈。靈威加護佑民生。生生生。生生世世放光明。奠安社稷重。神武體羣情。鎮方境域。威德權衡。廟貌馨香光俎豆。尊崇神社敬皇陵。祭神如神在。齋明竭盡誠。皇民知感化。迷信戒除清。清清清。清潔身心善教行。守法奉公義務膺。祈神佑家園。災消禍不生。長期建設。共樂昇平。

又詩

上下一團結 神人愛國深 破邪歸正路 脫却免消沉
克己行公益 守身體聖箴 時時存省察 禍去吉祥臨

護世天尊 駱 評曰

夫神者。司陰陽之造化。主民生之禍福。為人所依賴也。必善願以感神。庶達禮神之目的。此篇之訓誨。深且切矣。

南宮星君 柳 詩

仙風道骨本天生 幸遇明師指引成
脫俗投玄皈正道 破迷入悟了塵情
滿腔浩氣冲霄漢 兩袖清風步玉京
任意逍遙長自在 結緣度世下東瀛

金錢詞 柳枝體

金錢錢。外圓內空宛如天。無翼能行動。無事受腰纏。四方八達任留連。國家寶。寶惜結人緣。老少愛。男女被戀害無邊。金錢錢。錢樹開花人愛纏。欠酒債。貪利欲。作竊盜。失感情。為爾害得倒顛顛。作姦犯科為此起。殺生害命喪黃泉。金錢錢。使人愛爾受榮遷。貧富任受用。滿腔出自然。貪吏營分外。臭名萬古傳。金屋藏嬌也為爾。任人受用總無偏。金錢錢。世情無爾囊空懸。夫妻生恩愛。恩愛感情連。善用真是寶。濫用盡招愆。英雄為爾困。廉潔被爾遷。禍福無門人自召。咎歸於爾也徒然。何如稍遠爾。反省自心田。金錢錢。錦衣玉食富無邊。王侯為爾貴。交情為爾牽。貪戀虛華誤少年。轉眼衰頹到。難買無常壽算延。爾我各分別。帶不得分文到黃泉。何如看破爾。學個長生不老仙。金錢何足寶。銅臭不值錢。早知了悟。熟詠金錢篇。

又詩

榮辱無常態 因貪自害身 守成安素志 知足法前人
飽飫糟糠厭 奢華富貴親 知修惟善寶 快樂作仙神

護世天尊 駱 評曰

諺云。人為財死。鳥為食亡。財本國寶。而人不善用之。貽害無窮。星君此柳枝詞。鋪張錦綉。花樣翻新。言的透徹。醒人心目矣。

南宮星君 孔 詩

瀟灑風塵不計秋 超羣拔類出人頭
長生自有通靈竅 不老還虛入聖儔
嘯傲煙霞詩酒伴 煉形服氣汞鉛修
丹成九轉功圓候 五島三山任我遊

悟道詞

聖凡聖凡。聖凡迷悟此玄關。迷如千山萬水隔。悟如寶鏡鑑毫端。凡夫輩。狎昵徒。富貴貪饕慾樂歡。慾樂歡。名利鎖。死死生生都不關。轉眼雞皮鶴髮。無常一到。忙不了。畏死貪生挽不還。挽不還。妻兒替不得。魂飛魄散苦心酸。苦心酸。臭皮囊一壞。令人不忍觀。聖賢早悟此。超脫隱靈山。隱靈山。靈山會上把身安。俗緣拋意外。榮辱不相干。借假修真九轉丹。磨煉身心不退轉。功圓行滿入仙班。逍遙真自在。長與三界仙真任盤桓。始信聖凡由志向。覺超迷墮兩循環。悟乎悟。不難不難。

又詩

仙佛凡夫做 立心有不同 真修無著妄 志道可圓功
看破浮生客 學成不老翁 塵緣終是假 幻化一場空

護世天尊 駱 評曰

世人之希仙佛者多。而向學道者少。畏難退縮。何以登仙階。出苦海哉。此悟道詞之點醒。可不勉哉。

先天將軍 朱 詩

巡迴護國佑民生 勸世飛鸞教化行
保赤安邦匡正道 體天行化啓羣情
頽風挽轉歸於穆 仁里共敦頌聖明
文教斯張咸普遍 謳歌載道頌昇平

太平詞

昇平樂。樂昇平。士庶咸熙賴股肱。元首良有道。億兆悉咸寧。德風頌。雨潤清。上和和睦體羣情。仁人思學步。雅範效而行。士農工商務本業。謙恭遜讓盡輸誠。守王法。夢不驚。師孝悌。旺門庭。文運光中教化興。無為臻雅治。聖道盡光明。道不拾遺門不扁。於穆堪讚美。真可福民生。繼及今之時。澆漓堪嘆驚。人心皆反古。宄訐挺才能。挺才能造陷坑。陷阱之中投法網。無非不作更橫行。孝義道德廢。節廉品格傾。綱常復奚顧。作殺戮橫。強欺弱。人類爭。坑陷干戈禍死生。何如修仁義。博愛企和平。尊皇重道德。爾我表同情。恩威濟美。寬恕和聲。大地環通。共存共榮樂太平。

又詩

天賦與民生 共存以共榮 何如相鬪殺 焉可互爭衡
人類同敦愛 心機契洽情 無非無禍患 自可樂昇平

護世天尊 駱 評曰

同類相夷。爭能鬪智。弗尚道德之文明。而挺貪殘之酷虐。何以臻於穆之世。而樂昇平哉。誠能依太平詞之唱和而行。不難沐魯兩鄒風之盛耳。

彰化文昌帝君 周 詩

彰明景象顯時新 化被賢愚啓後人
文藻才華為國重 昌榮祿秩蔭家身
帝心臨爾端風化 君宰無他說妙因
周比不羣嘉美德 詩歌雅頌贊皇民
詠四端詞 見孟子 左調相見歡

惻隱之心仁之端

臨危救急婆心。方便臨。濟人利物、功德鬼神欽。天賜福。人懷惠。感斯忱。
仁德之端、惻隱抱須深。羞惡之心義不端不善知改無羞。寡悔尤。惡斯消滅、侃侃
出人頭。良心現。不善改。義理修。羞惡之心、萬罪付水流。辭讓之心禮之端言談
應對謙謙。禮謹嚴。威儀可象、人俱爾仰瞻。謙受益。滿招損。避疑嫌。無大言不
作。學之勿厭。是非之心智之端隱惡揚善無非。志不違。黑白分明、善勉與過規。
不遷怒。不貳過。不相推。是非無礙、智慧盡發輝。

又詩

人曰誰無過 過宜曉善遷 道心推克廣 義理勉宜堅
惻隱仁乎哉 是非智矣焉 聖賢為法則 辭讓禮儀先

護世天尊 駱 評曰

末世澆漓。人每厭古。重虛文而不求實學。故文昌以相見歡為調。咏以四端。
提醒世道人心。知道德之端倪。詞調允洽。洵可悅人心目也。

白鶴仙翁 詩

白雲秋水兩悠悠 鶴馭飛騰四部洲
仙跡仙踪超俗氣 翁修翁行脫凡儔
有緣廣度十方衆 無德難登三界遊
舉眼塵情皆幻幻 何如早泛渡人舟
詠四苦詞 左調青江引

生苦

因地呱呱苦一聲。陰陽混合成。性光元自在。喜怒只知鳴。母子因緣係死生。

老苦

攜筇扶杖倚橋西。衰齡嘆不齊。頭童齒豁態。步履苦登梯。桑榆暮景可憐兮。

病苦

床第呻吟苦不休。起居無自由。六脉孔空急。膏肓恨弗瘳。肌消骨立悵悶愁。

死苦

駒光迅速疾如梭。生死限難逃。病苦交煎急。追命見閻羅。半生功業一身拖。

又詩

乾坤為逆旅 生活在其中 老朽年華減 病衰歲月攻

死休靈不滅 幻化性猶融 造物循環理 分明業與功

護世天尊 駱 評曰

人生最苦。莫如四苦若也。然人咸知。莫可逃脫。而不覺悟急修。醉生夢死。隨世浮沉。深可悲嘆。此白鶴仙翁之咏。藉青江調為詞。頗為痛切以醒人也。

果老仙翁 張 詩

蓬萊弱水隔凡塵 島內風光四季春

果證三千延鶴算 老成九轉作真人

仙緣廣結蟠桃會 翁道宏開舌相新

到處談玄參妙理 幾多悟得種良因

咏三不祥詞 見荀子 左調長相思

一、幼不肯事長

長不尊。幼不分。尊卑失序亂狐羣。驕矜敗德根。笑斯文。等鷄豚。無禮無儀何足云。不祥嗟嘆君。

二、賤不肯事貴

賤前因。貴前因。貴賤由天胡可嗔。執拗不事人。誤自身。害自身。不謀自立只愁貧。不祥實難陳。

三、不肖不肯事賢

不肖儔。賢肖儔。一般亦是前生修。知命何怨尤。出人頭。學低頭。禮賢未肯是真羞。不祥嘆末流。

又詩

世途實險惡 智慮日交攻 不肖嗟無及 賢人嘆失常

中庸誠自得 大學要參詳 修養恭儉讓 縱容合聖衷

護世天尊 駱 評曰

夫不出人頭地者。皆緣自傲其氣。自暴其志也。士君子必能屈能伸。庶可謂大

丈夫。張仙翁調以長相思。藉咏三不祥以勸世。文詞清雅。意切言賅。吟之實可爽心覺悟矣。

仙翁鍾離 詩

終南得道顯宗風 廣度良緣際會同
夢示黃梁開覺路 道明性體豁愚蒙
逍遙快樂登天界 證果成真住碧宮
八友蟠桃朝赴會 瓊漿盛會慶無疆

咏益者三友損者三友詞

友直 左調塢練子

親有德。近賢人。學他正直益吾身。
勿等奸刁終損己。良朋是輔益加親。

友諒

交際上。信要真。是非諒解德為鄰。
勿等謊狂多反復。過規善勉福相因。

友多聞

愚好學。賢要親。博通智識作高人。
勿等矜誇終敗陷。良朋益友益終身。

友便辟

舍正道。好邪遊。去明投暗不知修。
朋比為奸真損友。財消名喪實堪愁。

友善柔

巧言色。諂媚儔。害人無算暗中憂。
無憑無信輕佻輩。損友斷交向善修。

友便佞

言多詐。佞多謬。好奇輕聽勿交酌。
禦人口給身家誤。損友者三要慎修。

又詩

為世談交友 友朋係匪輕 善良德是輔 損益義同行
蘭室生香味 桃園結美名 五倫聯絡上 慎擇要關情

護世天尊 駱 評曰

五倫之中。友居其一。欲立身行道。顯親揚名者。非慎交遊。擇益友而輔之。何以為後援哉。然好濫矢風流。交損友而妨害之。終難進身之階。鍾離仙翁深憐世弊。摘宣聖之要作詞調。為交友謹慎。巧妙文章。誦之不厭。宜善領悟焉可。

鐵拐仙翁 李 詩

會同八友作詞篇 不速佳賓合絡聯
飲酒吟詩誠樂趣 談天說地是真緣
葫蘆自有長生藥 神氣長存不老仙
蕩蕩飄飄閒散外 救民苦海度良賢

咏益者三樂損者三樂詞 左調南歌子

樂節禮樂

聲律陶情性。邪正要知分。鄭聲盈衛亂邦君。節樂尚韶舞。典則堪遵。樂多賢友無友不如己。損益要相諄。賢師廉藺共榮存。不孤德是輔永立奇勳。

樂驕樂

驕奢生淫佚。快樂亂性天。罔知節度誤心田。急反省免樂極苦無邊。

樂佚遊

宵小相為伍。佚遊挺少年。正人君子隔天淵。荒亡敗行、誤身辱祖先。

樂宴樂

聲色為宴樂。濫交酒作緣。昏迷長醉杏花天。罔回首財破身輕可憐。

又詩

仙酒酒進來 進來掛酒排 酒排換茶店 茶店變香齋
脫俗知津味 超凡豁所懷 誰人學得我 醉臥小蓬萊

護世天尊 駱 評曰

人具良知良能之心。孰無好樂之癖。但要勿太過知節約為正耳。鐵拐仙翁之現身說法。以孔聖之箴言。作此損益三樂之詞。行行鍼砭。字字珠璣。令人讚咏而忘倦。閱者當善警覺。方不負仙翁之婆心耳。

金闕選仙 呂 詩

純陽演正列仙翁 超脫人天化大同

智慧劍光消鬼魅 圓明真性闢洪濛
萬家香火咸尊仰 三界皈依聽法宗
體聖為衷宣教道 飛鸞救世勉修功
咏能行五者於天下詞 左調點絳唇

恭

尊卑有序。溫文雅氣學謙恭。淑人君子。其儀不忒良。交遊不失。外侮盡和衷。
敬慎而行企仰從。品格益端莊。

寬

溫柔和氣。無非無是少災殃。伉爽心腸。利肚量廣包容。好施惠澤。懷惠報無
疆。利己利他功德堂。得衆要寬宏。

信

出納無誑。千金一諾不貳衷。好學賢良。進退勿徬徨。去兵去食。信字不可忘。
社交任重免乖張。成敗在此中。

敏

圓融迅速。機權達變自和同。勿荒勿忙。鼠頭憤事空。云為百計。捷足破天荒。
經營家國修天爵。敏則有奇功。

惠

汎愛於衆。施恩布德義融通。克勉自躬。待人盡寬量。推多就寡。公益感民衷。
懷惠懷刑相報効。感戴好修功。

又詩

人世談平等 強權害衆生 德心盡放棄 惡念亂胡行
強弱相爭奪 偏邪辜較萌 天災流劫數 業力結而成

護世天尊 駱 評曰

夫聖道之匡王政。必先以道德為立基。謙恭約己。仁愛待人。故宣聖示此五者
行於天下。則惡有爭競之心哉。金闕選仙呂祖之婆心。舉此五者之要。綴為詞章。
文意條達。發揮奧義。令人易於領畧。吟而不倦也。

仙翁 曹 詩

飲酒吟詩出自然 蓬萊島上醉翩翩
長生有分修真道 塵慮無心學聖賢

嘯傲煙霞空眼界 逍遙風月淡雲天
娑婆世上繁華甚 幾個同吾結勝緣

咏周禮有三行詞 左調一剪梅

一曰孝行以親父母

父生母育德如天。懷胎十月。乳哺三年。
移乾就濕抱兒眠。日夜相連。劬勞萬千。
長大猶期子孫賢。擇婦嬋娟。和諧百年。
雙雙孝敬悅親前。百行為先。金榜名懸。

二曰反行以尊賢良

棠棣之華一本生。葉也榮榮。萼也榮榮。
爾等同胞是弟兄。兄也友情。弟也友情。
友情恭敬互尊稱。福曜門庭。和氣門庭。
勿生齟齬鑑田荆。家和事成。百業可成。

三曰順行以事師長

玉人雕琢奪天工。寶璧無雙。價值無雙。
人才造就作英雄。師恩難量。報德難量。
尊師重道勿乖方。德顯名揚。官顯名揚。
事師事父義融通。順敬厥躬。永佩厥躬。

又詩

人倫推要重 義理切宜修 孝為立身本 梯關應世酬
師尊開仕路 友誼學賢儔 順從依此教 自可佔鰲頭

護世天尊 駱 評曰

人心不古。世道日漓。捨道德而不顧。忘根本而就枝末。殊可嘆憐。夫天地君親師。為吾人覆載養育栽培之大德。而罔報効者。禽獸不若矣。曹仙翁有鑒世人所缺處。舉周禮三行之要領。藉一剪梅以為詞。文句新妍。殊為確切。知音者當感咏不能忘矣。

仙翁 韓 詩

金卮酒再斟 詩腸豪興吟
生們勤獻酌 與我契知音

又詩

玉簫吹徹楚天秋 雨落郊原納海流
雲散碧空歸野雁 霞輝霄壤返青牛
蒼蒼古木參參秀 兩兩黃鸝嘹嘹遊
四季長春真勝概 仙家樂處古中修
咏君子有九思詞 左調江南春

視思明

視思察。察思明。身心無外染。天理自流行。
世間萬事皆由我。眼界當分備萬靈。

聽思聰

眼觀察。耳聞聲。黑白當分曉。是非要別清。
不被塵紛生障礙。聽宮朗朗發聰明。

色思溫

和顏靄。喜氣生。應酌無嫌隙。交際盡和平。
涵養性情敦品詣。溫柔禮貌此中行。

貌思恭

先下氣。學柔情。笑容可掬態。儒雅禮宜誠。
進退方圓恭有禮。端莊容貌好前程。

言思忠

訥言行。話勿輕。謙恭為處世。言約要輸誠。
大節不渝忠信重。畢生富貴搏功名。

事思敬

敏於事。謹而行。放懷終貽誤。街亭失可驚。
翼翼小心思敬謹。自然作事盡通亨。

疑思問

葫蘆裏。解不清。猜疑嗔恨起。辨問要分明。
釋破疑團歸道路。人情修好作賢能。

忿思難

勿計較。莫爭衡。忿憶生冤結。忘親誤一生。
忍耐三分無鬪氣。萬般災難化無形。

見得思義

非己有。愛勿生。明瞞暗取輩。貧賤報分明。
應分而求多益善。好將義理要關情。

又詩

九思詞作盡 放筆把金罇 重赴騷壇會 再斟喝酒羣
吹簫歌一揆 吟律續斯文 欲反仙山去 有緣再會君

護世天尊 駱 評曰

學而不思則罔。思而不學則殆。誠哉是言也。人心之動作云為。失於省察者則過矣。聖人垂教。君子必依九思而行。乃防閑身之道德也。韓仙翁巧調江南春。以三五七體為詞。闡明九思之真理。文工句煉。絕妙美吟俾世易解。不啻紙貴洛陽矣。

仙翁 籃 詩

仙山仙友唱仙歌 籃底籃花籃采和
陶意陶情陶美景 賞花賞月賞絲羅
心心心印心中樂 靜靜靜思靜裡哦
酒興酒斟酒飲 撈詩撈句盡撈搔
咏君子有三畏詞 左調如夢令

畏天命

人生賦性於天命。本具良知自然。寤寐存省察。勿使惹過招愆。畏天畏天。天命德教純全。

畏大人

遵規守法勿偏。舉止盡學良賢。赫赫師尹仰。敬畏尊重安然。恩威並濟保我黎民無邊。

畏聖人之言

言行堪師聖賢。道德安危配天。君民千古仰。學步追隨必然。敬遵訓誥榮顯裕後光前。

又詩

與酒結深緣 延遲酒不前 酒杯空在手 茶盞且停筵
客氣非佳客 仙丰即是仙 撈騷頻索飲 笑殺醉顛顛

護世天尊 駱 評曰

夫作奸犯科。殃民肆虐者。不知天命王法聖言之可畏也。是故逸居無教。則近於禽獸矣。藍仙翁知世道之危微。舉此三畏。作如夢令之詞調。釋明要畧。教人知所敬畏。其才華詞藻。巧妙豪咏。洵可悅目爽心。足見仙家獨此超然耳。

仙翁 劉 詩

襟期瀟瀟豁幽情 飲酒吟詩樂此生
氣吐長虹尋道侶 性光發朗覓玄英
仙家自有長生訣 世上應無不老齡
只為貪嗔癡愛誤 浮沉苦海墮迷坑
君子有三戒詞 左調相見歡

少時戒之在色

心無把握少年。性易遷。迷津咫尺、墮落苦憂煎。
血未壯。氣未定。色戒焉。守精氣神三寶順自然。

及壯戒之在鬪

血氣筋脈剛堅。易變遷。好勇鬪很惹罪並招愆。
憂父母。禍妻子。淚交漣。何如學忍辱、福海無邊。

及老戒之在得

度才量力衰年。盍善遷。孜孜貪得騎鶴與腰纏。輕性命。
忘根本。為利牽。直待無常始悔悟遲延。

又詩

擱筆酒重斟 揮毫再咏吟 俗緣締結厚 道化感懷深
夜漏蟲聲唧 更殘鳥語沉 神人相告別 復會契知音

護世天尊 駱 評曰

若匹夫之負氣。不顧品詣之所敦。驕奢淫佚好勇鬪很。貪得無厭喪志辱身。故聖人申三戒之訓。而劉仙翁善綴以詞華。詳明解釋。義理兼賅。盡仙家之巧趣。調以相見歡而譜新聲。為犯三戒者警醒焉。

仙姑 何 詩

漫云女輩不成真 吾列仙班屬女人
道要勤修修可得 行須磨煉煉其身

超宗脫俗登天府 勉己度他悟妙因
大會蟠桃欣酒宴 觀山涉海顯奇珍
咏子絕四詞 左調採桑子

母意

湛然常悟虛靈。外也清清。內也清清。
心上無關不著情。如如不動觀自在。
聖也可期。仙也可成。念頭毋意光明。

毋必

萬慮交攻打破清。苦也無形。樂也無形。
富貴妻財意外輕。三心四相如幻化。
和靄盈盈。瀟灑榮榮。妄思毋必靈明。

毋固

隨緣隨分樂塵情。無忝所生。無勞我形。
渾然大化盡和平。色相皆空空可度。
道也可成。仙也可登。皆由毋固執行。

毋我

應分希求不苟爭。克己輸誠。勉己經營。
不貪不著取無形。萬般非有難奪志。
取與分明。明暗公平。毋我絕四堪稱。

又詩

詩詞已作罷 舉酌對仙卿 玉漏旋吹急 良宵結勝情
坤流須學步 乾健要同行 速速修真早 度君上太清

護世天尊 駱 評曰

人世無常。如夢幻泡影。只存一點真心耳。夫心即神。神即我性光。修道者即修性光。至於無聲無臭。夫子之絕四。即釋尊所云空四相也。成仙作佛。超凡入聖。亦從修證中來。甚矣、道之理微。仙姑欲度世情。釋明絕四之真理。作為詞調易於吟咏了然。俾世知孔道與佛道。互相咬合。其義深面句巧。頗堪吟而不輟也。

仙姑 麻 詩

仙卿連袂下仙山 賞覽風光展笑顏
靄靄香雲風蕩蕩 清清佳氣水潺潺
淡中有趣心安樂 世外無干意自閒
騎鹿雲遊臨濟度 勸人修道脫塵寰

咏四勿詞 左調浪陶沙

非禮勿視 (中調)

眼為鑒察官。妍醜誰瞞。貪著外誘內難安。

心猿意馬逐。招惹生端。邪緣勿苟安。

冶容勿看。非禮非分莫貪觀。

眸兒修得正。仁字無難。

非禮勿聽

耳為採聽官。外舞周旋。是非入內博悲歡。

瀆褻生邪氣。無明傷殘。害得心不安。

非禮勿干。聰聽聰聞免業端。

聽宮修得正。仁德行圓。

非禮勿言

舌為是非官。考慮萬全。使人成敗口攸關。

訥言敏行戒。談笑防閑。綺語搏人歡。

不免傷殘。非禮非儀言可酸。

舌端修得正。求仁不難。

非禮勿動

動為使命官。舉止任權。作威作福斡運旋。

行善善不難。為惡惡關。戒心勿放寬。

非禮防閑。步履綏和萬禍刪。

視聽言動正。歸仁行全。

又詩

詞兒吟四勿 至道化重光 人為貪癡誤 心因愛欲攻

如仙仙不動 若聖聖無荒 勤學修持早 同登極樂鄉

護世天尊 駱 評曰

心本無妄。妄因邪生。為貪物欲之私。妨害本然之善。夫子之教顏子。修四勿以為仁。而登聖域矣。今世凡夫。每越此範圍。故麻仙姑舉此四勿作詞調。述聖訓之真道。以教士女修持等輩。可為立身必由之大道也。其仙姑之柳絮才。綴錦詞章。如金石之佳作。閱者當玩索而勿忽焉可。

仙姑 孫 詩

苦志操磨成佛仙 姑嫜孝敬子孫賢
錦衣玉食無心戀 華屋銀屏有意遷
勘破双修容自毀 堅持獨步受熬煎
師稱不二金蓮七 功行圓通出性天
咏子以四教詞 左調卜算子

文

少年須黽勉。立志要豪雄。奮發詩書通六藝。
拔萃萬人中。青紫如拾芥。捷步入蟾宮。
光前裕後聲名顯。富貴樂無窮。

行

貧富無怨惡。驕諂不相欺。素位而行安且樂。
樂天知命宜。孝為百行首。德以道立基。
殷勤敦篤無差謬。絜矩勵時時。

忠

為人謀大事。報効要盡誠。休疑負重圖徽徯。
背任責匪輕。上而行家國。下而係民生。
皆宜忠義立身本。庶得發前程。

信

若車無輓軌。推轂亦難行。人而無信亦猶此。
交際被人輕。急早修篤實。四海盡歡迎。
季布千金移不得。後世永留名。

又詩

詞名卜算子 敦厚不風流 四教闡明勸 一心脫化修
人能弘大道 世要泛扁舟 邂逅相逢渡 蓬萊島上遊

護世天尊 駱 評曰

不患無位。患所以立。士君子之立身。必先修品德。次及文章。故夫子以四教。為人進身之階也。而孫仙姑之素行。相夫內助。示四教於兒曹。承先人之世澤。受重陽濟度。夫婦而双修。志抱不二。卒入仙宗。可為後世之矜式。作此詞調。鮮四教之真諦。文理包括。殊為確切。吟咏可豁襟懷耳。

探瑚仙子 詩

觥觥泛綠味生香 欵洽殷勤轉興長

嘯傲煙霞成素癖 逍遙風月沁詩腸
祥雲繞袖遊三界 瑞氣氤氳遍八荒
此是仙家真勝概 願人同步樂西方

逍遙吟

逍遙吟 逍遙吟 逍遙吟咏醒人心
心杳窈 意沉沉 沉沉夢詠梅花落
那悟無常一信音
仙家樂 仙家吟 縱橫任自在 散外作高吟
吟吟吟 吟詩消遣樂道心 樂道心兮樂道心
道心隱現傲泉林 風月為伴侶 靈鳥作絃琴
琴聲非比凡塵韻 物外天開別好音 好音吹入耳
嬾嬾遶梁吟 深深深 深味逍遙吟 引人登覺路
早悟此佳音

又詩

苦樂人未解 貪趨苦海沉 仙家世共慕 迷窟性偏臨
美味同嗜好 真言弗稱心 娑娑誠可嘆 引作逍遙吟

護世天尊 駱 評曰

仙家超脫。在於無碍。藉風月以消遣。寓雅意以度人。其味無窮。宜善悟焉。

南宮星君 孔 詩

逍遙物外出塵林 似水如雲一片心
兩袖清風飄日月 一支塵尾拯浮沉
逢人濟度歸仙境 寄跡留題述聖箴
無鎖無枷真自在 誰家同詠菩提吟

逍遙菩提吟

閒散外。逍遙仙。逍遙樂道興悠然。
興悠然兮興悠然。悠然看破道心堅。
心堅看破塵情事。看破塵情盡苦煎。
苦煎為業累。業累墮情牽。牽牽牽。
牽妻帶子家庭我。家庭假我害真緣。
害真緣。貪癡弗善遷。善遷知返本。
返本脫迷淵。歸正道。正道皈依養性天。

天天天。天人交接會。大道在參禪。
參透禪機絕念慮。三身四智性中仙。
本來無去住。浩氣塞無邊。修成戒定慧。
毫光照大千。超脫皆由我。逍遙不計年。
五行不拘繮。造化亦難遷。菩提大乘路。
永證大羅仙。有心同道勿延勿延。

又詩

菩提本無種 種向發心來 來去杳冥幻 幻冥結聖胎
胎因緣所住 住相感情懷 懷抱超凡客 超凡不染埃

護世天尊 駱 評曰

夫所謂衆生者。為貪嗔癡、而昧本來。未能修菩提之果。樹功德之林。遂致愈墮愈深。此吟之傑作。說破道情。可為入道者之法則矣。

詞集總結評

夫詩言志。詞悅情。其鋪張作綴。不膠俗韻。不滯凡情。吟之餘韻可以遏遶梁。聞之足以悅耳爽心。陶人情性。啓人愁腸。樂府韻調。管絃譜洽。此詞之真髓。所以為難能也。如上仙真等。舉孔孟之箴言。各盡其技。發揮所長而傑作。飄飄乎宛如仙聖臨軒。而見真容矣。閱者當善領默謝。庶不負仙聖婆衷耳。